

Na osnovu člana 61. stav (2) Zakona o upravi ("Službeni glasnik BiH", broj 32/02), i čl. 37. i 43. Zakona o državljanstvu BiH ("Službeni glasnik BiH", br. 4/97, 13/99, 41/02, 6/03, 14/03, 82/05 i 43/09), ministar Ministarstva civilnih poslova Bosne i Hercegovine izdaje

UPUTSTVO

O IZMJENAMA I DOPUNAMA UPUTSTVA O NAKNADNOM UPISU U MATIČNU KNJIGU ROĐENIH KOJI SU STEKLI DRŽAVLJANSTVO R BiH U SKLADU SA ZAKONOM O DRŽAVLJANSTVU REPUBLIKE BOSNE I HERCEGOVINE

Član 1.

U Uputstvu o naknadnom upisu u matičnu knjigu rođenih koji su stekli državljanstvo R BiH u skladu sa Zakonom o državljanstvu Republike Bosne i Hercegovine ("Službeni glasnik BiH", broj 27/00)(u daljnjem tekstu : Uputstvo), u članu 3. stav 3. se briše, a u daljnjem tekstu Uputstva riječ "MCPK" u odgovarajućem padežu zamjenjuje se riječju: "Ministarstvo civilnih poslova Bosne i Hercegovine (u daljnjem tekstu: Ministarstvo)".

Član 2.

Član 4. Uputstva mijenja se i glasi:

"O zahtjevima za naknadni upis, koje podnesu lica iz člana 3. st.1 i 2 odlučuje nadležni općinski organ i o tome vodi propisanu evidenciju.

Nadležni općinski organ dužan je dostaviti Ministarstvu obavijest o naknadnom upisu. Obavijest o naknadnom upisu sadrži osnovne podatke o licu koje je podnijelo zahtjev za naknadni upis i pravni osnov upisa. Uz obavijest se obavezno dostavlja primjerak rješenja o naknadnom upisu, zajedno sa zahtjevom i pratećom dokumentacijom.

Obavijest o naknadnom upisu, s pripadajućim prilogima, dostavlja se odmah, a najkasnije u roku od tri dana od dana donošenja rješenja o naknadnom upisu.

Nadležni općinski organ obavještava Ministarstvo o konačnosti rješenja o naknadnom upisu odmah, a najkasnije u roku od tri dana od konačnosti."

Član 3.

Član 6. Uputstva se briše.

Član 4.

U članu 7. Uputstva stav 3. se briše.

Član 5.

Iza člana 8. Uputstva dodaje se novi član 8.a , koji glasi:

“Član 8.a

Jedinstvenu bazu podataka o naknadnom upisu u matičnu knjigu rođenih, koji su stekli državljanstvo R BiH u skladu sa Zakonom o državljanstvu Republike Bosne i Hercegovine vodi Ministarstvo."

Član 6.

Član 9. Uputstva mijenja se i glasi:

"Nadzor nad primjenom ovog Uputstva vrše Ministarstvo i nadležni organi u okviru svoje nadležnosti."

Član 7.

Iza člana 9. dodaje se novi član 9.a, koji glasi:

"Član 9a

Predmeti naknadnih upisa koji su u toku završiće se u skladu s ovim Uputstvom."

Član 8.

Ovo Uputstvo stupa na snagu danom donošenja i objavljuje se u "Službenom glasniku BiH" i službenim glasilima entiteta i Brčko Distrikta BiH.

Broj 06-1-30-2-1169/09
9. jula 2009. godine
Sarajevo

Ministar
Mr. **Sredoje Nović**, s. r.